

Mes organs – mia decisiun, propi?

DAD ANDREA L. RASSEL

Dapi ils 13 d'avrigl èn da vesair en tut la Svizra ils novs placats da l'Uffizi federal da sanadad publica concernent la promozion da la voluntad da donar organs. Il slogans èn «Jau sai tge che jau vi» u era «Jau decidel sez». Parallel mussa la televisiun svizra in spot sin tut sias chadainas. Il spot mussa, tenor l'Uffizi federal in extract representativ da la populaziun svizra, sco per exaimpel en ina zona da pedun bain frequentada. Insaquants dals passants han sa decidì per ina donaziun, auters èn encunter che lur organs servan ad insatgi auter sunter la mort e terzs n'han naging'opiniun en connex cun quest tema.

Veglia problematica

Ils davos trenta onns èn las pussaivladads en connex cun la transplantaziun d'organs creschidas significantmain. Bleras malatias e malfunziuns d'organs san vegnir guaridas. La gronda part da la populaziun en Svizra vesa avantatgs da la metoda da transplantaziuns d'organs e na metta ella betg en dumonda. Però malgrad las meglras pussaivladads e



l'acceptanza generala han las clinicas da sbatter cun in grond problem. La dumonda per organs crescha bler pli fitg che l'offerta. Campagnas sco quella da l'Uffizi federal da sanadad publica vulan appellar al singul da far il bain e da sa decider da daventar donaturA d'organs. L'argumentaziun è pia d'ina qualitad plitost morala; il success deplorablmain plitost modest.

Novas schliaziuns

Sch'ils inserats, ils placats Sed ils spots na portan betg il progress giavischà, pudess'ins ponderar schliaziun alternativas. Ina fiss d'intercurrir sch'il slogan central «Mes organs – mia decisiun» cunstettia propi. Uss pretenda il sistem ina decisiun positiva ed activa da daventar donatur d'organs dal singul individi. I è da quintar ch'ina gronda

part dals Svizzers e las Svizras n'èn betg da principi encunter da daventar donatur, mo ch'els pon e vulan betg vegnir activs sez. In augment significant dal dumber da donaturs d'organs pudess per franc vegnir cuntanschi cun midar il sistem fundamentalmain e da pretender dal singul da sa decider activamain encunter la donaziun d'organs. Mintga maiorenA en Svizra fiss alura da prinzipli donaturA d'organs e mo cun ina declaraziun explicita da na betg vulair donar ils ses organs vegn el u ella deliberada da questa obligaziun.

In'otra metoda d'augmentar il dumber da donaturAs pudess sa basar sin stimulaziun plitost che sin obligaziun. Ins pudess dar a persunas ch'èn prontas da donar lur organs cundiziuns spezialas. Per exempel ina reducziun dals custs per l'assicuranza da malsauns u era in tractament favorisà sch'els sez han da basegns ina transplantaziun d'organs.

En mintga cas è da facilitar il process da daventar donaturA d'organs e da minimalisar ils obstachels birocratics perquai che mintga organ donà po salvar ina vita.